

Schwarz-Schilling: BiH mora preuzeti odgovornost



Tranzicija ka odgovornosti domaćih organa potrajaće duže nego što je pretpostavljano prije godinu dana, što je posljedica kašnjenja u procesu reformi u Bosni i Hercegovini te dešavanja u široj regiji, piše visoki predstavnik i specijalni predstavnik EU, Christian Schwarz-Schilling, u članku objavljenom u Frankfurter Allgemeine Zeitung.

Kao rezultat toga, visoki predstavnik i specijalni predstavnik EU preporučiće Vijeću za provedbu mira, koje se u ponedjeljak i utorak sastaje u Briselu, da mandat Ureda visokog predstavnika produži za godinu dana.

Gospodin Schwarz-Schilling je objasnio da on, bez obzira na to, i dalje ostaje opredijeljen za princip odgovornosti domaćih organa te da povratka intervencionizmu neće biti.

“Opasna je iluzija misliti da je nametanjem moguće izgraditi funkcionalnu državu, oživiti ekonomiju i učvrstiti pomirenje,” piše on. “Institucije i demokratski procesi mogu funkcionirati samo ukoliko građani ove zemlje i političari vjeruju u njih.”

Visoki predstavnik i specijalni predstavnik EU posebno je skrenuo pažnju na važnost ustavne reforme u preostalom dijelu njegovog mandata.

“Sporazum koji je postignut u Daytonu imao je za cilj da okonča rat i nije dovoljan za izgradnju demokratskih i efikasnih državnih struktura,” piše on. “Novi ustav mora odgovarati evropskim standardima i vrijednostima, kako bi Bosni i Hercegovini omogućio put u Evropu.”

Kompletan tekst članka visokog predstavnika i specijalnog predstavnika EU možete naći na sljedećima web adresama: www.ohr.int i www.eusrbih.org.